

欒城後集卷之十六

宋眉山蘇轍子由著


劄子十五首

兄除翰林承旨乞外任劄四首

臣伏見兄軾近除翰林學士承旨兼侍讀以臣備位執政不敢復居要職比雖受命仍奏乞候過坤成上壽再乞外任伏念臣頃蒙誤恩擢居丞轄才微德薄常有負乘致寇之憂但以遭逢聖明恩德深厚未知所報不敢求去今者乃以忝冒之故復致兄



王執禮子敬全校
顧天叙禮初



軾逡巡退避不敢安職於臣私情莫遑寧處况復兄軾才高行備
過臣遠甚不唯衆所共知抑亦 聖鑒所亮兼臣自蒙擢用今將
半年雖日夜勉勵終無所補若使兄軾得安處侍從論思講讀正
其所長未必無補於 聖德也故臣以謂 陛下只可使弟避兄
不可使兄避弟只可使不肖避賢不可使賢避不肖區區愚懇竭
盡於此伏乞 聖慈察臣深心除臣一郡上以全 朝廷之公道
下以伸兄弟之私義臣不勝至願冒昧自陳取 進止
貼黃臣自聞兄軾相次到闕卽欲上章避位意謂恐涉援引兄
軾之嫌今者竊觀 朝廷擢用兄軾首冠禁林經筵眷遇之意
可謂至重榮名厚祿亦云極矣雖愚無知豈復更有僥倖無厭
之望臣以此不敢復避小嫌令兄軾不安其職伏乞 聖慈體
察早賜施行

第二

臣竊以君臣之間譬如父子中有所懷不當不盡臣近以兄軾爲
臣備位省轄不敢安職援引故事力求補外臣內緣長少之義外
量賢愚之分冒瀆 聖聰欲求一郡以厭公義今月十二日而被
德音以臣與軾既非同官不須回避臣退而思念 聖恩隆厚
不以兄弟並處要劇爲嫌畧去形迹責之實効臣等雖復捐軀何

以爲報然而兄弟孤遠愚拙寡援前後進用皆出聖造臣旣預聞國政兄復首冠侍從一家寵榮朝臣未見其比若不知退避下則羣言可畏上則陰譴可虞旣兄弟未可並退而臣自知才氣學術皆不如兄是以自求引去意欲使軾稍安於位竭力圖報庶幾有補於國而無害於家耳區區之誠非復矯飾伏乞 指揮檢會前奏早賜施行取 進止

第三

臣忝備執政無補萬一而兄軾自外召還以臣故不敢安處要近力求補外臣比以長少之宜能否之分再歷肝膽乞守郡自効以安私義皆面蒙 聖訓不允所請雖再三干冒已不容誅而區區寸誠終不可已特以坤成在近臣子皆得上千萬歲壽况臣遭逢恩寵倍常是以未敢復有所請欲俟過 聖節卽伸前懇伏乞

聖慈特賜鑒察取 進止

第四

臣伏以臣兄軾近自杭州召還爲翰林學士承旨兼侍讀軾以臣備位政府避嫌請外臣亦再上章自陳以謂 朝廷若以長幼論之則當使弟避兄若以才不論之則當使臣避軾事理至順必見從而志淺言輕不蒙聽察兄軾近已蒙恩除知潁州雖 聖恩深

厚曲遂其請而緣臣忝冒致之外徙不惟私意有所未順質之公
議尤曰非宜况臣供職以來於今半年雖勉強自將而毫髮無補
久妨賢路心自不遑欲乞 聖慈諒臣誠心非有矯飾特除臣一
郡以安愚衷干冒 宸嚴不勝戰汗隕越之至取 進止

舉王鞏乞外任劄子五首

臣伏見御史中丞鄭雍殿中侍御史楊畏言臣前任中憲日舉王
鞏不當臣伏自念臣昔薦鞏本緣方今人物衰少惜其才有可採
謂宜洗濯瑕疵稍加錄用朝廷因此過聽除鞏大藩臣雖無欺
君之言終有輕舉之罪人言不已情實難安伏乞 聖慈速正典
刑以弭羣議取 進止

第二

臣昨以鄭雍楊畏言臣薦王鞏不當奏乞速正典刑以弭羣議尋
復見諫官虞策與臺官安鼎亦論此事內虞策所言與鄭雍楊畏
不甚相遠惟有安鼎謂臣欺罔詐謬機械深巧不速譴責恐臣挾
朋誕謾日滋日橫信如鼎言則臣死有餘責有何面目尚在 朝
廷今臣既以舉官不當乞行 朝典不敢復與鼎辨別曲直然鼎
頃與趙君錫賈易等同構飛語誣罔臣兄軾以惡逆之罪嘗與君
錫等同上殿奏對上賴 聖鑒照察知其挾情虛妄君錫與易即

時降黜惟鼎今在言路是以盡力攻臣無所不至 朝廷若不逐臣鼎必不肯已伏乞 聖慈憫臣孤立無援早賜責降使鼎私意得伸不復煩瀆 聖聽則臣死生幸甚臣謹已家居待罪伏乞早賜施行取 進止

貼黃臣本欲候二十二日奏事面陳家居待罪之意但以鼎攻臣甚急若不早自引避恐再以惡言見及伏乞 聖慈體察

第三

臣適蒙恩押赴起居奏事尋面奏以臺諫有言理合同避乞除外任以安危迹蒙 德音宣諭臺諫所言止是舉官不當一事令臣

且爲 朝廷安心供職官仰照 聖恩察臣無他過惡便合祇專

訓詞不當再有陳請然臣備位執政而舉非其人國有成法在臣則當奉法以率衆於 朝廷則不宜曲法以私臣况臣比年以來再任言責每有論奏不敢觀望以此仇怨滿前孤立寡援每一念此不寒而慄雖無人言自當引去今羣言未已其鋒可畏若不蒙 聖恩諒臣此心許臣補外實恐橫被攻擊立見顛隳臣已不敢復入東府見在天壽院聽候 指揮伏乞 聖慈愍臣窮迫早賜施行臣無任祈天竢命激切屏營之至取 進止

第四

臣今日伏蒙 聖恩特降中使賜臣不允陳乞外任詔書一道仍傳宣聖旨令臣早赴省供職者孤危之迹以外爲安保全之恩留而不遣仰荷眷獎惟知感泣然念臣兩任臺諫因緣言事仇怨甚多今輕舉之罪雖蒙寬貸終恐難以自安伏乞 聖慈察臣危懇檢會前奏早賜開許再三干瀆天聽無任惶懼戰慄之至取 進止

第五

臣今月二十五日伏蒙 聖恩特降中使賜臣 詔書仍傳 聖旨令臣赴省供職臣以愚直寡助朝多仇怨尋具劄子復申前請臣之愚意非止欲求安身蓋將稍息煩言免致上瀆 天聽俯伏 族命今已三日未聞報可憂懼實深尙冀 聖慈察其孤慄畏人之心恕其再三冒聞之罪檢會累奏早賜施行則臣死生幸甚取進止

乞賜張宣徽謚劄子

臣伏見故宣徽南院使太子太保贈司空張方平始以博學高文名冠多士終以中立不倚望重累朝練達政體言不虛發遭遇 聖明眷禮隆異每用其言輒效見當世其所不用皆有驗於後當熙寧變法之際與大臣議論不合引就外補年方七十懇請致仕

杜門不出十有餘年觀其始終動合典禮有古人大節然性本渾
 朴不近名譽臨終戒其子孫不許請謚立碑士大夫聞之莫不嘆
 息臣昔少年識方平於成都一見以忠義相勉其後兩從奏辟分
 兼師友竊以謂約身殺禮雖人臣執謙之美而誅行易名本人君
 追遠之義况自方平之亡臣親聞 德音許其忠直竊見故事臣
 寮之家有不乞謚者皆因奏請特 詔禮官定議以示褒勸伏乞
 聖慈以臣此奏降付太常寺於其家取索行狀依例施行取
 進止

貼黃本朝翰林侍讀學士兵部侍郎兼祕書監贈太子太師楊
 徽之翰林學士承旨工部尚書宋祈此二人身亡皆不請謚其

後參知政事宋綬為徽之請謚曰文莊翰林學士承旨張方平
 為祈請謚曰景文伏乞付有司檢會施行

立 皇后制書劄子

臣昨日躬聽制書伏承 太皇太后陛下 上 皇帝云 皇 公選

賢淑下逮側微明建中 宮以助內治羣臣在位無不忻歡臣每因

進見備聞 德音知采 擇之艱前後經涉二歲所訪何止百家逮

茲成命 聖心勤止臣今日偶以在告不獲隨眾面致懇誠不勝

區區激切惶恐之至

論黃河軟堰劄子 申三省 狀附

臣今月八日以式假不預進呈公事竊見三省同奉 聖旨北流軟堰依都水監所奏候下手日先將檢計到功料奏取指揮竊緣臣從來都堂聚議常以謂軟堰不可施於北流利害甚明蓋東流本人力所開闢止百餘步冬月河流斷絕故軟堰可為今北流既是大河正溜北之東流何止數倍見今河水行流不絕軟堰何由能立蓋水官之意欲以軟堰為名實作硬堰陰為回河之計耳朝廷既已覺其軟堰之請不宜復從昨已於正月二十八日面奏大畧以謂昔 先帝因河決導之北流已得水性惟隄防未立每歲不免決溢之患小小決溢是黃河常事本不為大害而數年前朝廷議欲回河王孝先吳安持等因此橫生河事昔北京以南黃河西岸有鬪村等三河門遇河水決溢即開此三門放水西行空地至北京之北却合入大河故北京生聚無大危急只自建議回河先塞此三門又於西隄作鋸牙馬頭約水東流直過北京之止故北京連年苦急緣此水勢卧東故去年東流遂多於昔由此言之分流之說非徒無利實亦有害也何者每年秋水泛漲分入兩流一時之間稍免決溢此分水之利也河水重濁緩即生淤既分為二不得不緩故今日北流已見淤塞此分水之害也然將來

漲水之後河流東北蓋未可知臣等昨問吳安持安持亦言去年河水自東安知今年河水不自北 太皇太后宣諭曰水官尙如此言餘人更安敢保臣又奏曰昨來安持等因河流稍東乞於東流添掃五七緡稱此機會不可少緩臣等恐安持意欲因此指揮多添掃緡壅遏北流不爲穩便卽乞指揮所增掃不得過元乞數然時方河冰掃緡皆不到地所稱機會悉是妄言安持等旣未得如意卽又奏乞北流河門只留一百五十步蓋北流河門本闊三百餘步今若塞其大半河流旣未可保其不北若使所塞堅壯不可動搖則漲水咽怒必爲上流之患京師以來皆未免憂也若所塞浮虛漲水一至隨流蕩去人工物料無慮數百萬頃刻而盡民之膏血深可痛惜然臣愚意亦非敢便謂河水必北而不東也但欲候今年夏秋漲水之來徐觀河勢所向水若全東則北流不塞自當淤斷水若復北則北河如舊自可容納 朝廷作事務在萬全若行險僥倖萬一成功此則水官之意臣不敢從也安持等旣見前計不行則又要橫截北流以爲軟堰見今北流稍緩安持等已恐因此生淤故立此堰然却因此堰欲盡留使臣人工物料積漸增卑撩淺卽是用河上諸掃人力般土填河數月之後積土成山不知與見今河淤孰爲多少名欲分水實是同河決不可許臣

欲乞先令安持等結罪保明河流所向及土堰若成有無填塞河道致將來之患然後遣使按行具可否利害 太皇太后曰水官猶不能保河之東北時暫遣使又安能知且可重別商量臣奏曰臣迫於異同之論故乞遣官若出自 聖斷只 朝廷商量亦無不可 太皇太后又曰縱令水官結罪待其敗事然後施行於事何補臣奏曰誠如 聖旨昔修六塔河先責李仲昌狀其功不成隨即責降此是富弼等當時謬政不足復用今來 聖旨極爲允當臣退復思之嘗聞頃歲北流河門闊十餘里水面闊七八里今來河門止闊三百餘步蓋水官數年以來堙塞大河一至於此使洪流不安誰任其咎又東流河門止濶百餘步每年漲水東行已有滿溢之懼今復欲併入北流理難包畜遂指揮中書工房令作畫一問都水監至今未有回報 朝廷欲作軟堰當候問得此二事委無妨礙有實及臣等看詳實有利無害乃可施行若不待報遽降依奏指揮必恐有悞國事雖云先具功料奏取指揮然已令依奏下手則是邪說已行必致驚動衆聽且貽後患伏乞 聖慈特賜詳察降臣此議副三省所有八日指揮乞未行下俟臣參假商量取旨河事至重措置不當一方生靈被害非細臣時暫在告心有所見不敢默已干冒 天威甘俟誅譴取 進止

工房畫一

一勘會北流元祐二年河門元濶幾里水面濶幾里逐年開排
直至去年只濶三百二十步有何緣故

一勘會東流河門見今濶幾步每年漲水東出水面南北濶幾
里南面有無堤岸北京順水堤不沒者幾尺今來北流若果
淤斷將來漲水東行係併合北流多少分數有無包畜不盡
貼黃看詳軟堰之議吳安持等本只是奏乞令外丞司相度北
流水勢如更有減落卽令用軟堰權閉元未敢使乞下手今

朝廷指揮更不相度便令下手卽依奏之言深爲未當兼將來
敗事安持等得以歸過朝廷尤爲不便臣忝預執政只合每
事反覆商量不當獨入文字只爲此命一行臣自度參假之後
必不敢不爭若大臣爭已行之命顯異同之迹非所以示天下
故須至密入此疏仍已一面密申三省乞未施行

附論軟堰申三省狀

右轍今月八日以式假不預進呈不事竊見中書省錄黃北流
軟堰事三省同奉聖旨依都水監北外都水丞司所奏候下
手日先將檢計到功料奏取指揮竊緣轍從來於都堂商量以
謂軟堰不可施於北流利害甚明兼曾於正月二十八日面奏

蒙 聖旨令別具商議聞奏今來八日指揮愚意實未以爲然
况轍時暫在告心知不便難以緘默已別具論奏謹具申三省
所有八日指揮乞未行下工部俟參假日更別商量取 旨謹
狀

論御試策題劄子二首

臣伏見御試策題歷詆近歲行事有欲復熙寧元豐故事之意臣
備位執政不敢不言然臣竊料 陛下本無此心其必有人妄意
陛下牽於父子之恩不復深究是非遠慮安危故勸 陛下

行此事此所謂小人之愛君取快於一時非忠臣之愛君以安社
稷爲悅者也臣竊觀 神宗皇帝以天縱之才行大有爲之志其

所設施度越前古蓋有百世而不可變者矣臣請爲 陛下指陳
其畧 先帝在位近二十年而終身不受尊號裁損宗室恩止袒
免減 朝廷無窮之費出賣坊場雇募衙前免民間破家之患罷
黜諸科誦數之學訓練諸將慵惰之兵置寄祿之官復六曹之舊
嚴重祿之法禁交謁之私行淺攻之策以折西戎之狂收六色之
錢以寬雜役之困其微至於設抵當賣熟藥凡如此類皆 先帝
之聖謨睿算有利無害而元祐以來上下奉行未嘗失墜者也至
如其他事有失當何世無之父作之於前而子救之於後前後相

濟此則聖人之孝也昔漢武帝外事四夷內興宮室財賦匱竭於是修鹽鐵權酤平準均輸之政民不堪命幾至大亂昭帝委任霍光罷去煩苛漢室乃定光武顯宗以察爲明以讖決事上下恐懼人懷不安章帝卽位深鑒其失代之以寬豈弟之政後世稱焉及我本朝 眞宗皇帝右文偃革號稱太平而羣臣因其極盛爲天書之說 章獻明肅太后臨御攬大臣之議藏書梓宮以泯其迹及 仁宗聽政亦絕口不言天下至今遵之 英宗皇帝自藩邸入繼大臣過計創濮廟之議 朝廷爲之洶洶者數年及 先

帝嗣位或請復舉其事寢而不答遂以安靖夫以漢昭章之賢與

音 仁宗

神宗之聖豈其薄於孝敬而輕事變易也哉蓋事有

不可不以廟社爲重故也是以子孫旣獲孝敬之實而父祖不失聖明之稱此眞明君之所務不可與 流俗議也臣不勝區區願陛下反覆臣言慎勿輕事改易若輕變九年已行之事擢任累歲不用之人人懷私忿而以 先帝爲詞則大事去矣臣不勝憂國之心冒犯天威甘俟譴責取 進止

第二

臣近以御試策題有欲復熙寧元豐故事之意尋具劄子論 先帝所行善政見今遵行者自己非一其間事有過差元祐以來隨

宜修改以安天下者正是子孫孝敬之義未審陛下以臣言爲然否臣竊觀自陛下親政於今已足半年臣等日侍清光若

聖意誠謂先帝舊政有不合改更自當宣諭臣等令商議措置

今自宰臣以下未嘗畧聞此言而忽因策問進士宣露密旨中

外聞者莫不驚怪譬如家人父兄欲有所爲子弟有不預知而取

與行路謀之可乎臣聞兩喜必有溢美之言兩怒必有溢惡之言

喜怒不忘於心而以議天下之政必有過甚而不平者朝廷雖

有今昔之異其實一家欲有所爲當愛惜事體豈可如仇雠之相

反惟患不速也哉頃者元祐之初初議改更亦未免此病故役法

一事隨改隨復數年而後稍定臣於此時初爲諫官後爲御史每

言差役不可盡行而河流不可強遏上下願望終不盡從陛下

以此察之臣非私元祐之政也蓋知事出忽遽則民受其病耳議

者誠謂元豐之事有可復行而元祐之政有所未便臣願陛下

明詔臣等公共商議見其可而後行審其失而後罷深以生民社

稷爲意勿爲此忽忽則天下之幸也取進止

貼黃臣竊見章惇昔任樞密使與司馬光爭論役法其言有曰

免役之法利害相雜又曰見行役法今日自合改更又曰自行

免役所遣使者不能體先帝愛民之意差役舊害雖已盡去而

免役新害隨而復生今日正是更張修完之時又曰凡改更政
事固有不可緩者有可以緩者如京東西保馬緩一日則民間
有一日之害此不可緩者也如役法歲月之間改更了當誠不
爲緩 陛下謂惇豈欲破壞元豐故事者哉而言猶若此則元
祐改更誠不爲過矣

待罪劄子一首

臣以愚拙特蒙 聖恩擢用不次備位政府已及三年報效不聞
負乘爲罪前後累致煩言浼瀆 天聽孤危之迹寢食不遑祇自
去秋以來紛紜少止方欲祈天請命 補外適以 東朝變故

不敢自陳今者偶因政事懷有所見輒欲傾盡以報知遇而天資
闇冥不達機務論事失當冒犯 天威不敢自安謹已遷入觀音
院待罪伏乞 聖慈察臣久欲退避以免素餐之譏憐臣不識忌
諱出於至愚之性少寬刑誅特賜屏逐以允公議臣無任瞻 天
瀝懇戰懼殞越之至取 進止

樂城後集卷之十七

宋眉山蘇轍子由著

明東吳顧天叙禮初全校

表記劄子狀共十四首

元祐七年生日謝表二首

臣轍言伏蒙 聖恩以臣生日特遣中使降詔書賜臣羊酒米麵者與聞幾政每懷尸祿之憂時及初生曲蒙好賜之厚使華臨賁親族增榮臣轍誠惶誠恐頓首頓首伏念臣起自猷畝之微貧無甌石之積永念屬厭之戒曾無求飽之心迨玷近班適綠乏使不

稱是懼如醉其憂豈意生育之期復煩慶賜之重此蓋伏遇 皇
帝陛下政本於惠禮從其隆萬物盛多如魚麗之時羣臣和樂有
鹿鳴之喜斥餘宰以為饋助燕私而不忘自顧何功敢竊大烹之
養誓將圖報少逃素食之譏臣無任感 天荷 聖激切屏營之
至謹奉表稱謝以聞

臣某言伏蒙 聖恩以臣生日特遣中使降詔書賜臣羊酒米麵
者弧矢之祥永記於生育廩庖之賜曲被於 渙恩祇荷 寵靈

豈勝愧懼臣輒誠惶誠恐頓首頓首伏念臣少方志學曾藜藿之
莫辭長欲事親愧旨甘之不瞻雖居近列之寵常懷罔極之悲願

乏遠謀猥叨亟饋此蓋伏遇 太皇太后陛下約於奉已侈在養
賢躬周公吐哺之勞服大禹惡酒之戒特推觴豆之賜以助室家
之私敢不下酌民言助調國政庶無覆餗之患以圖報德之方臣
無任感 天荷 聖激切屏營之至謹奉表稱謝以聞

笏記

臣伏蒙 聖慈以臣生日特遣中使降詔書賜臣羊酒米麵者獲
貳文昌再經生育薦蒙慶賜之典仰承慈惠之風食浮於人念素
餐之可愧任過其量無令德之足觀欲報之心未知所措臣無任
感 天荷 聖激切屏營之至

元祐八年生日謝表二首

臣轍言伏蒙 聖恩以臣生日特遣中使降詔書賜臣羊酒米麵者老逢誕日泣養親之無從賜出天厨愧君恩之莫報臣轍誠心誠恐頓首頓首伏念臣生於窮陋晚被寵榮粗飯垢衣未改生平之舊嘉肴旨酒每驚日食之豐復緣載育之辰曲霑馭幸之典一家交慶心口自慙此蓋伏遇 皇帝陛下儉以約身優於養士敕廩人而繼粟閔褐父之睨盛力行舊章以惠列辟德非易物澤而漏泉矧茲異數之隆非復周行之比食無避難敢忘臣子之心士在屬厭更誦古人之戒臣無任感 天荷 聖激切屏營之至謹奉表稱謝以聞

臣轍言伏蒙 聖恩以臣生日特遣中使降詔書賜臣羊酒米麵者惠以餼牽示同安於飽滿繼之麪粟思共享於和平臣轍誠惶誠恐頓首頓首伏念臣生自寒鄉幼被慈訓父篤教忠之義母有擇隣之風孤苦積年衰罷無用每逢生日私竊疚懷敢期老病之餘獲霑好賜之未既醉且飽兼喜與悲此蓋伏遇 太皇太后陛下知臣下之劬勞散廩庖之充積謂漿或不以而周雅作刺食每無餘而秦風變衰霑爲大亨度越前世蓋視如手足俾知體貌之隆况門有桑蓬本效馳驅之用欲圖報德誓以移忠臣無任感

天荷 聖激切屏營之至謹奉表稱謝以聞

笏記

臣伏蒙 聖慈以臣生日特遣中使降詔書賜臣羊酒米麵者枉蒙寄任空閱歲時每遇初生輒被好賜醉酒飽德雖喜太平之風鳴野食萃未展盡心之報臣無任感

辭門下侍郎劄子

臣竊觀今日內降 聖旨臣轉官除門下侍郎伏以執政近臣預聞 國論可用才舉難以次遷苟以先後歲月爲倫必致忝冒沉

論之議况臣頃由縣道擢真從官首尾七年歷盡華貫逮居承轄

之地訖無絲髮之功黽勉逾年慙負填臆敢期 聖眷未已擢任

愈隆臣反覆思之始者旣以不次度越衆賢今者又因見任遷貳

元宰前後僥倖豈可常然苟復冒居出納之司不知進退之分公

論不允必致顛隳况臣夙以愚拙誤蒙矜憫幸今 命出未下勢

尙可回伏乞 聖恩念臣孤危非有矯飾特寢 明命以安微衷

臣無任祈 天竢 命激切屏營之至取 進止

免太中大夫門下侍郎表二首

臣轍言伏奉 告命蒙恩除臣太中大夫守門下侍郎者久塵右轄無補於時進貳東臺有慙在列言莫宣於誠意聽未感於 高

明臣轍誠惶誠懼頓首頓首伏念臣頃以虛名誤蒙收錄旋塵近侍非有勞能咀噍文詞本腐儒之事業彈治邪枉犯眾口之憎嫌及夫進貳文昌日待軒闥隨眾出入得失何補於萬幾奉行文書勉强自慙者期歲此則聖主之所親見孤臣之所自知豈待人言難逃天鑒敢謂超升累級復進崇階雜用負乘行自招於寇盜未嘗狩獵食何取於鶉鴉伏望太皇太后陛下因功以舉賢選眾以拔士采其譽者必考其實聽其言者皆原其心如臣空疎自難隱伏特追成命以慰公言使聖朝無失於用人則臣愚若

蒙於厚賜臣無任祈天竊命激切屏營之至謹奉表陳免以聞

臣轍言伏奉

誥命蒙恩除臣太中大夫守門下侍郎者喉吻之

任密侍於禁中綸綍之行風傳於海內苟用人之失當於累上以非輕臣轍誠惶誠懼頓首頓首伏念臣西南陋儒墳史樸學非有過人之大節惟守事君之小心無不實不敢居其名非其任不敢竊其祿任歷三世年逾半生奉以周旋未始失墜今者乃欲以尋尺之材居棟梁之任以斗升之量受鐘鼎之藏雖欲欺君且非本志矧復躡等超累級之上遷秩非舊比之常靖言以思未見其可伏望皇帝陛下因任庶物照臨百官短長各盡其宜大小無失所養必其力有餘而後用則其任逾久而常新抑將多士皆賴以

安豈惟微臣獨被其賜愚衷已竭 天聽尙回臣無任祈 天族
命激切屏營之至謹奉表陳免以聞

謝大中大夫門下侍郎表二首

臣轍言伏奉 制命除臣太中大夫守門下侍郎再具詞免蒙降
批答不許仍斷來章者黃闡之崇惟賢是用四品之貴匪功弗加
自慙迂拙之餘併荷寵光之及臣轍誠惶誠恐頓首頓首伏惟

太皇太后陛下政由家出德與性成盡心與民雖萬鍾無愛於國
潔身由義雖一毫未嘗取人惟至清故大臣小吏不察而盡知惟
至公故貴戚近習不戒而自飭臣每因雙日獲覲 清光嘗恐病

羸不中於規模固陋難逃於冰鑑方欲仰干聰聽少避衆賢敢謂
未見瑕疵尙加進擢豈以其拙直無欺罔之過而遲鈍少狂躁之
心致此誤恩濫於末品此蓋伏遇 太皇太后陛下人非求備志
在養賢將欲因鮑以致管生尊隗以招樂子拔十覲五人之用累
百求一鶚之精廣而不遺多故致雜臣敢不仰體 聖意旁求哲
人旣以寬寤寐之勞亦以救空疏之不逮過此以往未知所裁
臣無任感 天荷 聖激切屏營之至謹奉表稱謝以聞

臣轍言伏奉 制命除臣太中大夫守門下侍郎再具詞免蒙降
批答不允仍斷來章者掌轄逾年何補六曹之劇納言置貳仍忝

一階之崇雖曰次遷要爲非據臣輒誠惶誠恐頓首頓首竊以臣之事君理先審已器小受大有滿溢之禍力薄負重有顛覆之虞臣世本寒微技止文墨向者翱翔翰苑才殫於書詔之間總執臺綱力盡於議論之際至於參陪大政實匪其人久爾冒居日深愧畏未能謀遠常恐見譏於匹夫有若發蒙何以折衝於下國方知難而欲退偶進擢之非常貪戀恩榮已乖行意之義顧瞻中外豈無潛德之人徒以天聽甚高異命已發循墻雖切反汗無緣上累朝廷知人之明下愧朋友責善之實此蓋伏遇皇帝陛下

游神淵默約見羣臣之情運智密微陰扶聖母之斷人惟求舊

德用日新念臣嘉祐之直言仕亦既久識臣建元之司諫心則無邪忘其鄙凡日加親近身非木石猶有圖報之心恩隆父兄當驗服勤之效臣無任感天荷聖激切屏營之至謹奉表稱謝以聞

進郊祀慶成詩狀

右臣伏覩今月十四日

親饗郊廟禮成肆赦者恭以莫大之儀

成於一日無窮之澤施及四方歡聲所同和氣畢應伏惟皇帝

陛下奉烈祖之成憲蹈父母之訓言臨御七年慎守一德人服孝

慈之化物知仁厚之心神祇降休麥禾薦熟長日既至舊章不忘

以爲再饗明堂未暇圓邱之大祀躬謁 皇地祇稽 先帝之遺
言惕然不寧述而非作是用修各祭之舊補不講之文人情所安
神意昭答况復肆眚之令下寬於冥頑已責之恩大弛於纍繫施
仁於不報之地收福於無求之中臣每侍 清光畧聞大旨勉強
吟咏形容盛明愧周頌二后之精深乏唐賦三禮之廣麗圖寫天
日自知難成間雜風謠猶或有取謹賦 皇帝郊祀慶成詩一首
謹繕寫隨狀上進輕冒 宸嚴臣無任慙懼激切之至謹進

免南郊加恩表二首

臣輶言伏奉 誥命以郊祀禮畢特加臣護軍進封開國伯食邑
五百戶食實封二百戶者幸以空踈獲陪元祀敢祈 恩霈下逮

無功臣輶誠惶誠恐頓首頓首恭以三年而郊百禮咸至上則
六聖德澤洋溢於無盡下則四方奔走勞苦而不辭鳩工聚財講
禮修器經涉累歲克舉舊儀斯皆恭儉足以感神 仁聖足以服
衆故得事舉如素禮成不違其於左右之臣豈有纖芥之助今當
宁之美以謙而弗居相祀之勞雖微而咸錄苟不知避將何以安
伏望 太皇太后陛下上屈至恩俛從私欲使無勞者不得受賜
而辭寵者獲遂本心體天地無私之明厲臣下有恥之節聰聽雖
遠懇誠必聞臣無任祈 天竢命激切屏營之至謹奉表陳免以

聞

臣轍言伏奉 誥命以郊祀禮異特加臣護軍進封開國伯食邑五百戶食實封二百戶者叨陪祀事已極忻榮貪冒寵光實增愧畏臣轍誠惶誠恐頓首頓首恭以 皇帝陛下紹統六聖臨政七年愛敬盡於事親故道要而用博終始念於典學故德修而弗知間者稽參古今並享天地人情既協神理弗違月朔以還雨雪猶作齋宿之際風霾未除及夫晝漏盡而天宇肅清月幾望而雲物晏燦執玉而進如將弗勝受福以歸謙不自有眾庶如堵歡忻一詞此則 聖性得於自然臣下望而莫及曾何誤寵橫及無勞伏望 皇帝陛下狗固請之誠收已行之命福昨既均於在列名器豈宜以假人益慎予奪之權深厲廉恥之節眇然微願冀在必從臣無任祈 天竢命激切屏營之至謹奉表陳免以聞

謝南郊加恩表二首

臣轍言伏奉 誥命特加臣護軍進封開國伯食邑五百戶食實封二百戶尋具表辭免蒙降批答不許仍斷來章者元祀告成靈貺昭答推廣乾坤之施普霑臣子之私願惟何勞竊冒斯寵臣轍誠惶誠恐頓首頓首伏惟 太皇太后陛下母儀三世坤載四方享天下之養而非以厚其身攬天下之務而非以私其族培附帝

業保佑神孫譬如農夫之養苗耘鋤以竢其長玉人之作器琢磨而望其成厲之以講學之勤示之以聽斷之敏導之事天而天錫之福訓之祀地而地應以和凡下民所以知戴吾君皆東朝有以啓迪其意如臣等輩絕企光塵雖復因時以舉儀祇合以從事參備羽衛進執豆籩豈有勞能坐被光寵此蓋伏遇太皇太后陛下因賑膳之餘慶錄左右之微勤以謂承天之休不可以專享及物之惠不嫌於過優致此誤恩首霑近列辭避無所寢興莫違臣無任感天荷聖激切屏營之至謹奉表稱謝以聞

臣轍言伏奉

誥命特加臣護軍進封開國伯食邑五百戶食實

封二百戶尋具表辭免蒙降批答不允仍斷來章者祇相元祀粗免弗虔敢緣均福之常妄冀及私之寵重紆訓語祇益兢慚臣轍誠惶誠恐頓首頓首恭惟郊廟之崇祖宗所敬先之以寬刑薄歛使民罔艱虞副之以潔粢碩牲使神無恫怨民神胥協家國用寧願臣何人預聞庶政裕民之意詔令具存事神之誠威儀可效乃者密侍旒冕手薦璧琮晬容穆然而祇畏之心明羣工肅然而吳敖之意息聽於輿人之誦知有列聖之風臣目覩盛儀無周南之嘆位在近列有糝前之譏首被恩私實增戰越此蓋伏遇皇帝陛下體二儀之博施襲累聖之成規霈然雨露之私

無覆賢愚之間勳封之錫深愧於勞臣田邑之加幾至於成國功

無毫髮 恩積耶山臣無任感 天荷 聖激切屏營之至謹奉

表稱謝以聞

蘇軾後集卷之十七 終

宋眉山蘇轍子由著

明東吳 王執禮子敬 顧天敘禮初 全校

表狀疏共十九首

汝州謝上表

臣轍言伏奉 詔命差知汝州軍州事臣已於四月二十一日到

任上訖者論事非宜本虞於大譴承命出守猶荷於 寬恩臣轍

誠惶誠恐頓首頓首伏念臣性本迂愚學非練達頃值時乘之始

偶同彙進之餘由一邑之棲遲歷九年之僥倖遍塵侍從未聞毫

髮之勞从處廟堂滋見斗筭之陋踈拙日慙於君父滿盈每誦於友朋貪戀寵光不知引避愚而自用言之不疑寡慮直前初獨任其狂斐于時妄作信自取於顛濟尙賴深仁黜臨善地此蓋伏遇皇帝陛下堯舜相受常懷善繼之心父母兼容深照不逮之實稍寬憲法特許省循收去幹之魂雖知甚幸若喪家之犬私竊自憐恐懼未忘寢興何暇有民與社永知愧於明時使過與愚冀或收於異日臣無任瞻天荷聖惶懼戰越之至謹奉表稱謝以聞

分司南京到筠州謝表

臣鞫言臣前得罪蒙恩落職知汝州六月十二日再被

告降

三官知袁州卽治陸行趨陳留具舟赴任九月十日行至江州彭澤縣界復被告降授試少府監分司南京筠州居住尋拜受前行於九月二十五日至筠州居住訖者愚守一心漫無趨避歲更三黜始悟愆尤臣鞫誠惶誠恐頓首頓首伏念臣家傳樸學仕偶聖時本無意於功名徒自勤於翰墨因時乏使亟塵言事之班竊食無功復預聞政之列纒經九歲遍歷要塗人心忌其超遷天意惡其盈滿捫心自省事猶可追任意直前罪所從出惟闇故不明利害惟拙故不達幾微以至罪積如山命輕若髮薦經彈擊雖

九死以猶輕黜守幽遐累千里而爲近今茲貴分留務棄置陋邦
不親吏民許追思其過咎稍霑祿秩俸粗免於饑寒人微固無可
言恩深繼之以泣自違天日分委泥塗朝無爲言思出獨斷此蓋
伏遇 皇帝陛下法天廣覆配地兼容雖雷霆之震驚與雪霜之
嚴冽未始絕物之命要在厚民之生故茲賤微猶得陳述如臣白
處本復何言願惟兄第二人迭相須爲性命江嶺異域恐遂隔於
存亡况復墳墓濶疏父子離散若臣家之憂患實今世之孤窮靜
言思之誰可告者惟有自投於 君父庶幾有冀於生全泣血書
詞叩關仰訴生有捐軀之日死存結草之誠臣無任瞻 天望
聖激切屏營之至謹奉表稱謝以聞

明堂賀表

臣轍言伏覩今月十九日 赦書明堂禮畢大赦天下者饗 帝
尊親古今之大典推恩肆眚天地之至仁舉此盛儀併在今日臣
轍誠歡誠抃頓首頓首伏惟 皇帝陛下以仁御世以誠事天乾
清坤寧兵戢民阜人悅故神罔不宥物備故禮得以成一享圓邱
三謁路寢誠敬之心與日兼茂寬大之澤靡物不蒙能事旣修全
福自至方將享堯舜之上壽膺成康之令名民願所同天心是若
臣頃侍帷幄稍歷歲時譴責之深坐甘沒齒江湖之遠猶冀首邱

久蟄泥塗聞震雷而惕若深囚籠檻得清風而自疑臣無任瞻
天望 聖激切屏營之至謹奉表稱賀以聞

雷州謝表

臣輒言臣先蒙 恩責降分司南京筠州居住於今年閏二月內
又蒙 恩責授化州別駕雷州安置已於今日五日至貶所訖者
謫居江外已閱三年再斥海濱通行萬里罪名既重威命猶寬臣
輒誠惶誠懼頓首頓首伏念臣性本朴愚老益頑鄙連年驟進不
知盈滿之爲災臨出妄言未悟顛危之已至命微如髮繫積成山
比者陸水奔馳霧雨烝濕血屬星散皮骨僅存身錮陋邦地窮南
服夷言莫辨海氣常昏出有踐蛇茹蠱之憂處有陽淫陰伏之病
艱虞所迫性命豈常念咎之餘待盡而已伏惟 皇帝陛下仁齊
堯舜政述 祖宗日月之明無幽不燭天地之施有生共霑憐臣
草木之微念臣犬馬之舊未忍視其殞斃猶復許以生全臣雖棄
捐尙識 恩造知殺身之何補但沒齒以無言臣無任感 天荷
聖激切屏營之至謹奉表稱謝以聞

移岳州謝狀

得罪南遷於今七歲投竄嶺表又已四年瘴癘所侵僅存皮骨親
屬淪喪生意幾盡自分必死荒徼不復歸見中原豈意 聖神御

歷思貸深廣不遺舊物尙許北還元子赦書重加開宥事出特
旨恩實再生臣見具舟前往自爾稍近華風遂脫瘴死君恩至
厚力報無由臣無任感天荷聖激切屏營之至

南郊賀表

臣轍言伏覩今月二十三日皇帝親饗圓邱禮成肆赦者臨御
再期初見上帝神人交感德澤旁周臣轍誠歡誠忭頓首頓首
伏以本朝六代八聖承平之久曠古所未聞三年一郊極盛之
儀有唐之成法因四海來祭之廣成百神受職之文推演神休肆
宥多辟恭惟皇帝陛下體天地之大德性堯舜之深仁受命之
符本緣斯致御世之道亦由是隆復因行禮之終益廣好生之澤
臣頃斥居荒服豈意生還今密邇邦畿亟聞敷命造庭稱慶雖
絕望於餘生鼓腹載歌竊有幸於今日臣無任瞻天望聖踊
躍屏營之至謹奉表稱賀以聞

降授朝請大夫謝表

臣轍言伏奉告降授朝請大夫賜紫金魚袋差遣勳封食實封
如故者罪大恩寬言者未厭官高德薄法所不容尙領真祠實出
寬憲臣轍誠惶誠恐頓首頓首伏念臣早塵近列無補明時下
則拙於身謀上則闇於國體先朝矜其愚陋宥以遐荒前後七

年浮沉萬死偶 眞人之御歷敷大號以惟新曾復舊官亟叨厚
祿然臣年迫衰暮知復何爲身利退藏顧未敢請因循於此黽俛
自慙雖復追削者五官仍且獲安於閑局渥恩至厚爲幸已多此
蓋伏遇 皇帝陛下以堯舜之仁行成康之政衷未忘於舊物恩
許畢其餘生臣謹當杜門躬耕沒齒蔬食知成生之難報姑靜默
以待終臣無任瞻 天望 聖激切屏營之至謹奉表稱謝以聞

復官宮觀謝表

臣轍言昨於虔州准告授臣濠州團練副使岳州居住臣尋乘船
至鄂州復准告授臣大中大夫提舉鳳翔府上清太平宮外州軍
任便居住臣已望闕祇受訖者謫徙南方自分必死恩移近地已
若再生復茲舊職之還仍領眞祠之秘居從私欲感極涕零臣轍
誠惶誠恐頓首頓首伏念臣稟生甚微處世多難反身自省本欲
忠孝于君親報國何功粗免愧畏于俯仰徒以冰炭難于同器仇
怨因而滿前被以惡名指爲私黨將杜其生還之路遂立爲不赦
之文前後三遷奔馳萬里瘴癘纏擾骨肉喪亡聞者爲臣傷心見

者爲臣隕涕雖白夫所聚公議自明而衆楚相咻有口誰訴此蓋
伏遇皇帝陛下體天地之造坦然無私奮堯舜之明斷然有作自
初踐阼卽聞德音內推聖母之慈仁外照羣臣之情僞薦垂恩宥
至于冉三春雷發聲蟄戶咸震臣得以遲暮復覩盛明頃嘗卜居
嵩穎之間粗有伏臘之備杜門可以卒歲蔬食可以終身生當擊
壤以詠聖功死當結草以效誠節至於陰陽之施草木何酬臣無
任

謝復官表二首

屏居田里忽捧絲綸恩旨非常驚喜交至臣中謝伏念臣向者叨
塵名位自取顛躓蒙召歸卽還舊物之厚中雖貶奪不失便地
之安衰老之餘退藏爲幸閉門念咎旣久謝於交遊沒齒無言蓋
僅同於木石雖未卽死豈復干榮此蓋伏遇皇帝陛下聖德日新
仁心天覆躬受八寶推恩萬方朝陽一升雖幽咸照時雨旣至摩
物不蒙遂使死灰再然朽骨重肉顧臣筋力已僊不任鞭策之施
耳目俱昏絕望清明之化論報無日荷恩則深臣無任

誕膺八寶承天地之休連錫二階均雷雨之施恩深難報感極何

言臣 中謝 伏念臣憂患餘生老病兼至廢黜雖久尚霑品秩之餘

奉養雖微更獲耕耘之助一毫以上皆出於君恩屢歲偷安有慚

於公議復叨寵數深屬無名茲蓋伏遇皇帝陛下天造曲成聖功

獨運深憐立柏稿重許發生示人以無私之心施德於不報之地臣

雖頑鄙粗識恩私筋力已衰莫展馳驅之用忠誠尚在豈以死生

而移臣無任

謝復_以寺表

臣輒言准_以昌府牒准 御筆手詔節文應係籍宰執墳寺昨經

改正仍並_以還者名書罪籍慙負明時 恩念私塋特還舊刹九

泉受賜荒隴生光臣輒誠惶誠恐頓首頓首伏念臣早以空疎叨

居近密始終無補愚不自量 恩禮誤加驟及既往一被黨人之

自上遺先臣之憂舊恩已移沒齒何覲豈謂 詔恩一出故物復

還邛塹絕芻牧之虞松檟變焦枯之色骨肉感滂閭里咨嗟此蓋

伏遇 皇帝陛下性仁無私 聖孝不匱覽 二帝初潛之地動

一物失所之懷號令所加存沒咸賴臣衰病已久報恩之日不長

子孫在前竭忠之心未替過此以往無所裁之臣無任瞻 天望

聖激切屏營之至謹奉表稱謝以聞

皇太后上仙慰表

欽定四庫全書
欽定大清會典事例
卷之六
臣轍言伏覩今月十四日 大行皇太后遺誥至潁昌府者毋儀
淪喪率土震驚臣轍誠哀誠殞頓首頓首 大行皇太后定策艱
難之中力辭政務之要功存社稷德及生靈奉諱云初痛心罔極
伏惟 皇帝陛下方以天下爲養遽有終身之憂孝愛兼隆哀慕
日遠臣久居謫籍適此召還感 恩至深奉慰無路臣無任瞻望
闕庭哀慟殞越之至謹奉表陳慰以聞

欽聖憲肅皇后祔廟慰表

臣轍言伏聞今月二十六日 欽聖憲肅皇后神主祔廟禮畢者
復土告終祔姑成禮悲動 宸極痛徹寰瀛臣轍誠哀誠殞頓首

頓首 欽聖憲肅皇后內治有光坤元至順方艱難之際好謀可

成迫聽斷之辰退藏於密奄棄萬邦之養永嚴七世之祠伏惟

皇帝陛下仁孝自天感慕踰等捨曾閔匹夫之志念文武創業之

艱深切誠心以幸天下臣限以在外不獲奔詣 闕庭臣無任瞻

望摧咽激切屏營之至謹奉表稱慰以聞

欽慈皇后祔廟慰表

臣轍言伏聞今月二十六日 欽慈皇后神主祔廟禮畢者孝不

及養永深敬愛之情禮極追崇亟成陵廟之制臣轍誠哀誠殞頓

首頓首 欽慈皇后毓德仁里作嬪皇家蚤棄宮闈未遑禱狄之

盛禮誕育 仁聖克復 祖宗之舊章神人共依中外追感伏惟
皇帝陛下孝恭成德思慕終身雖盡顯親之儀未忘念母之志
中外瞻仰啓處不遑臣限以在外不獲奔詣 闕庭臣無任瞻摧
咽激切屏營之至謹奉表陳慰以聞

大行太皇太后上仙功德疏

臣伏以道大難名本無心於民上功成卽去空結想於人間贊罷
棗修禊陳禱狄敢薦竺文之祕少資天福之餘 大行太皇太后
伏願乘佛妙因稱民善禱超升彼岸旣資福於今生降澤斯民終
未忘於故國臣無任瞻望滄泗激切屏營之至謹疏

皇太后上僊功德疏

右臣伏以仙馭賓天聖功在物哀纏率上痛切遺臣伏惟 大行
皇太后祖烈崇高坤儀博厚定立長之大議宗社以安避成功而
不居中外咸仰奄棄東朝之養倏起西方之遊易月有期因山非
遠願假佛乘之妙少資淨土之因超三界以無方福羣生於罔測
臣無任瞻望滄泗激切屏營之至謹疏

哲宗皇帝大祥功德疏

右臣伏以日月有期祥禫成禮甫終遇密滋極痛傷伏惟 哲宗
皇帝陛下臨御積年威神在物紹 聖考之遺業啓華鄂之遠圖

至矣成功盡然永慕爰假佛乘之妙少資仙馭之遊伏願追
聖於九霄齊光斗極福遺黎於四海等固山河臣無任瞻 天望

聖激切屏營之至謹疏

天寧聖節功德疏

臣伏以地厚天高取數固多於萬物堯仁舜孝降年濁水於百王
理雖出乎自然事必從乎眾欲是用假佛乘之至妙祝 宸算之
無疆 皇帝陛下伏願追繼祖宗之隆度越漢唐之盛恭儉以求
仁而仁至愷悌以祈福而福生兼獲華夷之心大副臣民之望臣
無任瞻 天望 聖激切屏營之至謹疏

東塋老翁并齋僧疏

降授朝請大夫護軍賜紫金魚袋蘇轍伏爲東塋老翁并近歲以
來泉源耗竭人失烹飪田失灌種先壠攸託中情惕然今因姪孫
新授廣都主簿元老西歸謹請戒律僧就墳側晨設齋轉經夜設
水陸道場以祈冥應謹具疏如後

齋僧七人每僧各轉妙法蓮華經一部七卷設水陸道場一夜
右伏以先君太子太師兆自東山躬卜靈宅泉出右麓流于西南
旱暵不乾霖潦不溢實有常德紀于耆舊越自近歲漸致枯竭永
惟良坎之德行止相尋山下出泉在易爲蒙蒙極必發失其常性

厥咎在人轍以愚暗曩竊名位積譴致罰以累茲泉今者歸依佛
乘救拔眾苦伏願道場清淨山神歡喜泉流漢發草木滋潤居人
蒙賜瑩域增固伏乞三寶證知稽首謹疏

樂城後集卷之十八 終

樂城後集卷之十九

宋眉山蘇轍子由著

明東吳 王執禮子敬
顧天叙禮初 全校

青詞十一首

京師

臣人以空疏預聞國政上愧天下慙君父常願蔑私以徇公捐
身以濟物而智有所不周力有所不逮事不稱心十常三四俯仰
愧負朝夕不忘而復愚幼之年過咎未免長而知悔往不可追頃
自十載以來心存至道清心寡欲僅乃少完浩如涉川未知攸濟

敢以初生之日仰祈真聖之恩察其誠心被以妙力令臣所志獲
遂所學有成國以永寧身以長久臣不勝大願頓首頓首謹詞

高安四首

伏以生於微陋性極冥頑叨冒國恩預聞政事才短德薄福過禍
生任意直前不知罪譴之增積終年三黜遂涉江湖之嶮艱手足
之親播遷瘴海父子之愛留寓中原寄迹高安遽逢生日術者薦
告厄運稍移仰叩天闈冀回聖造矜其愚而多恕察其中之無他
赦宥往愆刊除罪籍俾我同氣俱復近邦苟獲閑地以偷安非復
要途之敢望棲心澹泊粗成止欲之因畢老勤行竊冀長年之幸

傾倒激切不知所裁臣無任瞻天瀝懇惶恐戰越之至謹詞

伏以臣夫婦歸誠至道託迹塵寰自幼至今隨世所行豈免過咎
况復近歲預聞國事福祿盈滿功行茂聞致此顛隳復將誰咎重
以兄軾平生悻直仇怨滿前流竄海濱日虞瘴癘以至墳墓隔絕
父子分離相望萬里患不相救今斥逐以來薦歷寒暑追惟既往
非有邪慝憂患已深理或當復惟真聖慈閱與物無私庶幾北還
近獲成命非復有心於榮遇惟覬少獲於安全憐其虛心養氣之
勤錫以問道逢師之幸臣無任懇倒之至謹詞

伏以謫居高安行將再歲杜門自省日懼禍災乃者火焚閭閻勢

極熾猛風從北來正趨館舍治任挈族未知所適而風回火轉幸免焚爇向非神祇明察憐憫困窮則雖免灰燼之虞必有狼狽之患敢陳菲供少答靈貺伏願稍垂慶祐洗除宿殃臣無任懇倒之至謹詞

伏念本鄉通義以仕爲家再謫高才累年于此以忠獲罪夫婦漂流攜家不前男女離散宿有疾疢不甚康強飽暖安閑雖感恩於造物拘縻窘通常與嘆於異鄉日屆初生家陳薄供望三清而稽首仰衆聖以馳誠稍回恩光照此陋甯願涉新歲脫去宿殃祿命增長骨肉和合帽帽誠意莫敢盡宣臣無任擔天俟命激切屏營之至頓首頓首謹詞

龍川二首

伏念臣頃自甲戌之歲大運在酉命運相衝是歲生日之後自門下侍郎謫守汝州爾後四經流竄今在循州嶮阻厄窮何所不歷疾疢喪禍近復繼作雖邪酉逆順天理難逃微生不幸適丁其會然術推陰命先凶後吉自始入運今已七年豈始迎其災而終以其吉伏願俯念窮困稍垂寬宥覺悟朝廷解釋羅網骨肉安樂相從北還區區寸誠願盡於此臣無任懇倒之至謹詞

伏念臣始自甲戌得罪於朝流竄南方於今七載再投嶺表亦及

三年瘴毒所侵骨肉凋喪衣食所迫囊橐空虛脾肺冷洩藥石不效北歸無日老而益窮常懼寄死南荒永隔鄉井因上元之穀旦依道士之靈科稽首泥塗歸命仙聖一願養心煉氣日見成功積陰消散真陽充滿二願朝廷覺悟羅網解脫振衣北還躬耕爲樂三願南北眷屬各保安寧北歸之時一一相見臣已身心自誓屏去邪淫等觀寃親會加慈恕遇有方便知無不爲或在廟堂或在田野並推此心無有變易天地鬼神實聞此言雖生成之恩茲未能報而螻蟻之志死且不渝臣無任懇倒之至謹詞

閣阜

伏念臣頃自丁丑之春得罪朝廷流放海上是時舟過臨江近瞻閣阜遙望玉笥誠心惕然微福聖境願得生還中原當就茲山恭陳薄供以答靈造今已蒙恩授前件官岳州居住乘舟北歸復出山下而私行無力仰止勝地不能自致惟神格斯不可揆度容光必照何所不臨臣遭回瘴癘之鄉得脫病苦出入嶺海之際獲返江湖天地之恩草木何報重念臣志弱才短學術空虛頃歲忝冒實爲過分然其忠國愛民始終一心粗若無愧人不可罔而況於天儻茲心不誣願今日已往隨福所有隨力所堪除其艱難錫之安穩至於壽考由命富貴在天不敢妄祈有所非覬臣無任懇

倒激切之至謹詞

許昌三首

伏念臣頃以宿世舊殃七年流竄天墜在上矜其無他還寓潁川
粗霑微祿顧眎世事自知難堪姑願築室耕田養生送死優游里
社聊以卒歲惟是學道之心澹泊已久雖勉求虛靜而習氣未除
力行升降而天路猶壅疾病雖去精氣未凝方當厄運之終復遇
生日之至仰祈眞聖愍我勤勞洗濯往愆助成道力臣無任懇倒
激切之至謹詞

伏念臣頃自嶺外還居潁川雖身沾薄俸而心虞多難汝南經歲
老病逼身今茲甲申建歲庚申乘運邪人至此法當少泰偶於歲
首復返舊廬敢以初生之辰仰祈眞聖之祐然臣夙慕至道中無
他求唯是欲習初乾口望增進願心廣博終冀成就伏願隨力所
堪隨福所有內以安身外以及物雖退轉之咎自誓以必無而保
全之功實冀於冥助臣無任懇倒激切之至謹詞

伏念臣幼爲諸生力學雖蚤聞道則遲中歲從仕憂患常多安樂
則少晚年學道用力雖篤成功未期所經生日六十有七來日無
幾有志未從一自謫居南服首尾七歲旋居潁川又復五載齒髮
衰變氣血消亾回首功名自分已矣存心性命猶幸得之伏願眞

聖哀矜成就微志苟獲安身之福敢忘及物之心臣無任懇倒激切之至謹詞

祝文二首

嵩山祝文

轍昔緣吏役自陳如洛道出嵩少秋雨淫繁雲如絮纏覆山上
究觀近麓莫矚諸嶺據鞍默禱庶幾一見俛仰未幾豁然雲移如
卷重帷卻寘山後連峯角立草木可數驚顧竊歎莫知其由昔韓
愈南征有感於衡豈以無似克配前烈默然慙惕不以語衆至于
今日十有八年永懷疇昔有不能已謹遣家兵以茶酒香燭及佛
經疏伸導薄誠神鑒不昧景饗昭答謹告

汝州謝雨文

維紹聖元年歲次甲戌四月壬寅朔二十六日丁卯太中大夫知
汝州軍州事護軍蘇轍謹以清酒特羊之奠恭祭于北園社令后
土神君轍以罪戾謫守茲土自春徂夏旱饑爲苦麩麥殄悴禾禾
出畝吾民憂傷巫覡旁午念予罪人餘譴累汝間行北園亭曰致
雨前守趙王有禱咸許顧歎昔賢願躡前武掃地而祭屏去牖戶
清漪繞屋喬木環渚微風肅然神物來處吾僚祇敬齋宿吾府雲
興山際倏遍天宇風來不疾雷發不怒祈祈甘澤如哺如乳酒不

濡地鴈不升俎仁哉有神未請而予再宿告晴高下咸溥朝陽既
升鉏耨畢舉宿麥斯實施及禾黍吏免訶譴民病獲愈念惟始至
神則何取祇薦醪牲以永斯祐尚饗

城後集卷之十九

終

樂城後集卷之二十

宋眉山蘇轍子由著

明東吳王執禮子敬
顧天叙禮初仝校

祭文一十八首

祭張宮保文

維元祐六年歲次辛未十二月乙卯朔二十日甲戌中大夫守尚
書右丞蘇轍謹以清酒庶羞之奠致祭于故太子太保致仕張公
四丈之靈轍之方冠公守西蜀時予先君幅巾田服尺書見公一
見而知曰此鴻鵠困于棘茨君亦嘻嗟世莫知我孰謂斯人獨明

且果顧我與兄復往從之少未更事見亦弗疑後將

于家

邦斯言是信不折不降涉世多艱久而莫伸從公陳宋庇于有仁
既博以文又約以禮示我夷易行不知止南遷而還迎我而笑世
將用子要志于道我曰不然將復見公俛仰六年斯志莫從遺章
上聞匪私爾傷慶歷之遺今也則嗚呼公之少年坦然不羈自
放於酒竹林是師及其從宦精深粹密禮家法士莫見其隙公之
問學初亦弗勤汎然游心功倍于人有疑而問時罔弗達禮則鄭
產樂則吳札公之行已色温言厲卒然相逢忽若無意其所與交
金石弗渝可以托之六尺之孤公之事君道大言深心所不欲富
貴莫淫詭詞削草人亦弗知雖罔克用亦罔克疑公老於世事見
于外人之知公茲亦其槩公性靜深灼見安危遇物斯應動獲所
宜退而自養湛然純一與天爲徒惟道非術逮其將亾言若平生
寂然委惋不怛于行道實在天後必有傳謂予可教而亦弗聞公
入不出我出不還而使斯道忽乎茫然嗚呼尙饗

祭文與可學士文

元祐七年八月日太中大夫守門下侍郎蘇轍謹以清酒庶羞之
奠致祭于故知湖州與可學士親家翁之靈嗚呼漢蜀太守石室
之孫散居梓潼耕稼隱淪是生高人文如西京雅詩楚詞雲溶泉

清心恬手柔隸草從橫毫墨之餘遇物賦形怪石巘列翠竹羅生
得於無心見者自驚嗟世知公以是謂賢公心浩然實而弗炫有
觸不屈始知其堅世在熙寧士銳而黜利誘于旁奔走傾旋公居
其間澹乎忘言洋人病茶徐爲一宣抱志不伸委化而遷惟我與
公交友忘年以靜喜我申以婚姻子喪婦存諸孫在前撫而教之
尚侈公門窳窳有時送車盈阡千里寓詞聞乎不聞嗚呼尙饗

祭亾壻文逸民文

元祐七年八月日太中大夫守門下侍郎蘇轍以清酒庶羞之奠
致祭于故文郎逸民秀才之靈我與君翁忘年之義長女未笄許

適君子君少不羣介然老成誦詩屬文亦繼豕聲我獨怪君吐詞
悲傷是必多難否則不長別我于宋送君于株扶喪舟行萬里有
餘我邊南方君旅成都相望天涯逾歲一書我還京師幸將見君
一病不復發書酸辛女有烈志留鞠諸孤賦詩栢舟之死不渝悁
悁遺孫教以詩書庶幾有成歸大君閭嗚呼尙饗

再祭張宮保文

元祐七年八月日太中大夫守門下侍郎眉山蘇轍謹以清酒庶
羞之奠致祭于故宣徽南院使太子太保贈司空張公四丈之靈
公志大而才高氣直而慮深世俗之所不悅而君子之所服膺轍

從公游實見而知眇視世間若無足爲及其觀會通以行典禮蓋未嘗失時汎觀衆人澹然無心及其結意氣而司憂患蓋堅如斷金故方其出也仕歷三世雖未嘗不用而才莫能旣逮其處也與衆雜居雖罔有不伏而中情實疏究觀始終疑其天人或因物以有覺或逢人而益信由是蓄氣養神以終其身中忘我以發照外忘物而遠塵至於委化之日泊然反眞嗚呼我之從公始於父兄師友之交親戚之情而掩棺不哭送葬不行無以寄哀請易公名惟文與定庶幾平生公雖不求朝有典刑嗚呼尚饗

祭亾嫂王氏文

元祐八年歲次癸酉九月丙子朔十八日癸巳太中大夫守門下侍郎蘇轍與新婦德陽郡夫人史氏謹以家饌酒果之奠致祭于亾嫂同安郡君王氏之靈轍幼學於兄師友寔兼志氣雖同以不逮慙兄剛而塞物或不容旣以名世亦以不逢轍驟而從初未免憂嫂以婦人處之則優兄坐語言收畀藜棘竄逐邾城無以自食賜環而來歲未及期飛集西垣遂入北扉貧富感忻觀者盡驚嫂居其間不改色聲冠服肴蔬率從其先性固有之非學而然族人咨嗟觀行責報謂必多福繼以壽考中歲而殂理有莫知三子俱良瑯以慰之兄牧中山始殯而往謂我在茲屬以時享距城半舍

勞撫仲婦無感無懼祭遣諸子嗚呼哀哉尙饗

祭八新婦黃氏文

元符二年十一月四日辛未舅姑躬以家餼酒果之奠致祭于故
八新婦黃氏之靈吾不善處世得罪乎朝播遷南荒水陸萬里家
有三子季子季婦實從此行自筠徙雷自雷徙循風波恐懼蹊遂
顛絕所至言語不通飲食異和瘴霧昏翳醫藥無有歲行方閩氣
候殊惡晝熱如湯夜寒如冰行道殍仆居室困瘁始自僕隸浸淫
不已十病六七而汝獨甚天乎何辜遂殞于瘴追惟平昔慈祥寬
厚孰云不淑而止於是南北異俗伏臘幾廢燔炙豚魚漸漬果蔬
承祀寧賓不異中夏卒無一言歎恨流落逮及啓手脫然而逝惟
我夙業累爾幼稚興言涕落呼天何益五里禪室頃所嘗寓土燥
室完密邇吾廬權厝其間母或恐怖二子雖幼資可成就姑自鞠
養無水火患猶冀災厄有盡天造有復全柩北返歸安故土魂而
不昧識此誠意嗚呼哀哉尙饗

北歸祭東塋文

維建中靖國元年歲次辛巳三月壬戌朔十五日丙子男俱官轍
因姪千之等西歸謹以家餼酒果之奠昭告于先考編禮贈太子
太師先妣程氏追封成國太夫人之靈轍恭承先業奉教不謹紹

聖之初權臣擅命曾害忠良先除異已轍與兄軾同時遷南還回
江西流落嶺外奔走萬里始終七年尙賴世德有憑遺澤未泯久
處瘴霧雖病不死庚辰正月帝出于震推恩四海澤及兄弟同復
舊秩皆侍眞祠轍遂自龍川北還許始與諸子濡沫相收西望松
檟鬱葱在自然念灑掃弗躬齋祭遐邇歲月滋久悔咎何贖兄軾
來自海南道遠未至皆以困躓之餘思歸未獲如人病斃心不忘
起瞻望涕泗不知所言謹告

再祭亾嫂王氏文

維崇寧元年歲次壬午四月乙酉朔二十三日丁未具官蘇轍與
新婦德陽郡夫人史氏謹以家饌酒果之奠致祭于亾嫂同安郡
君王氏之靈嗚呼天禍我家兄歸自南沒于毘陵諸孤護喪行于
淮汴望之拊膺自媿之亾旅殯西圻九年于今兄沒有命塋我嵩
山土厚水深邁往告遷及迨初婦靈輜是升道出潁川家寓于茲
迎哭傷心遠日孟秋水潦方降畏行不能塋兆東南精舍在焉有
佛與僧往寓其堂以須兄至歸于邱林雖非故鄉親族不遐勿畏
勿驚嗚呼尙饗

再祭八新婦黃氏文

維年月日舅具官蘇轍姑德陽郡夫人史氏謹以家饌酒果致祭

于亾第八新婦黃氏之靈我昔南遷自筠徂雷自雷徂循萬里之
行季子季婦同此艱勤婦生名家有德有容幼而逮門纒綵相從
冒嶮涉瘴初無咎言念我兀窮往反

顏瘴病彌月藥

石不効卒殞當年弱子稚女躑躅吾側念母悽然汝往莫追撫此
二孫冀其成人命降自天舉家北返與柩俱還嗟哉吾兄没于毘
陵返葬邾山兆域寬深舉棺從之土厚且堅種柏成林以付而子
百年以安嗚呼尙饗

祭范子中朝散文

維建中靖國元年歲次辛巳十二月丁亥朔初十日丙申太中大

夫提舉鳳翔府上清太平宮護軍蘇轍謹以清酒庶羞之奠致祭
于故朝散范君子中之靈蘇氏范氏同出坤維蜀公告休居穎之
湄我老去國歸亦從之公逝久矣見其長子婚姻之故莫我遐棄
一叩我門遂不再至嗟夫不淑病日以侵一卧歷時弗寤弗興一
子旣冠一衣始勝我見蜀公帝城西偏君與仲叔笑言相驩叔先
仲亾君獨蒼顏內撫族黨外接友朋忝敬愷悌此邦所稱嗟我寓
新孰慰此心升堂不見哭不復聞俛仰幾何獨爲古人鄉黨之好
盡此一樽嗚呼尙饗

祭王子敏奉議文

維年月日具官蘇轍謹以清酌庶羞之奠致祭于故知縣奉議王
君子敏之靈昔我在宋吾兄在徐君家伯仲來學詩書行義不囘
詞章有餘我曰可人綴以婚姻既親且友其行日新伯氏不淑殞
于方春君登丙科又敏于政惠于上官民亦不病矯然眾中氣和
而正孝友之善中發於誠均其有無以及孤惻嫁女娶婦期不負
兄我居潁川君合陵臺十日稅駕爲我徘徊受法道師不近酒杯
我顧君笑自苦奚爲隙駒逝矣爲樂何時去我三年遂病以衰失
官居汝啓處未安伏枕不興將沒何言有志弗從使我永歎嗚呼
尙饗

祭亡兄端明文

維建中靖國元年歲次辛巳九月己未朔初五日癸亥弟具官轍
謹遣男遠以家饌酒菓之奠致祭于亡兄端明子瞻之靈嗚呼手
足之愛平生一人幼學無師受業先君兄敏我愚賴以有聞寒暑
相從逮壯而分涉世多艱竟奚所爲如鴻風飛流落四維渡嶺涉
海前後七碁瘴氣所蒸颶風所吹有來中原人鮮克還義氣外強
道心內全百折不摧如有待然真人龍翔雷雨浹天自儼而廉自
廉而永道路數千亦未出領終止毘陵有田數頃逝將歸休築室
鑿井嗚呼天之難忱命不可期秋暑涉江宿瘴乘之上燥下寒氣

不能支啓手無言時惟我思念我伯仲我處其季零落盡矣形影
無繼嗟乎不淑不見而逝號呼不聞泣血至地兄之文章今世第
一忠言嘉謨古之遺直名冠多士義動蠻貊流竄雖久此聲不沒
遺文粲然四海所傳易書之秘古所未聞時無孔子孰知其賢以
俟聖人後則當然喪來自東病不能迎卜葬嵩陽既有治命三子
孝敬罔畱于行陟岡望之涕泗雨零尚享

再祭亡兄端明文

維崇寧元年歲次壬午五月乙卯朔日弟具官轍與新婦德陽郡
夫人史氏謹以家饌酒菓之奠致祭於亡兄子瞻端明尚書之靈
嗚呼惟我與兄出處昔同幼學無師先君是從遊戲圖書寤寐其
中曰予二人要如是終後迺寒飢出仕於時鄉舉制策竝驅而馳
猖狂妄行誤爲世羈始以是得終以失之兄遷於黃我斥於筠流
落空山友其野人命不自知還服簪紳俛仰幾何寵祿遄遵欲去
未遑禍來盈門大庾之東漲海之南黎蠅雜居非人所堪瘴起襲
帷颺來掀簷臥不得寐食何暇甘如是七年雷雨一覃兄歸晉陵

我還潁川欲一見之乃有不然瘴暑相尋醫不能痊嗟兄與我再
起再顛未嘗不同今乃獨先嗚呼我兄而止斯即昔始宦游誦韋
氏詩夜雨對床後勿有違進不知退踐此禍機欲復斯言而天奪
之先龍在西老泉之山歸骨其旁自昔有言勢不克從夫豈不懷
地雖邾鄆山曰峨嵋天實命之豈人也哉我寓此邦有田一廛子
孫安之殆不復遷兄來自西於是磐桓卜告孟秋歸于其阡潁川
有蘇肇有兄先嗚呼尚饗

遣适歸祭東塋文

維崇寧三年歲次甲申八月壬寅朔二十一日壬戌男降授朝請
大夫護軍賜紫金魚袋轍謹遣第二男承事郎監東嶽廟适西歸
致祭于先君贈太子太師先妣程氏五三君追封成國太夫人之
墓轍自元符庚辰蒙 恩北歸西望松楸卽懷歸志孤拙多難事
與心違俛仰四年進退惟戾口月不待齒髮變衰深懼溘然無復
歸日遣适代往周行兆域有志不獲涕泗垂臆兄軾已沒遣言葬
汝轍與婦史夙約歸祔常指庚穴以敕諸子苟未卽死猶幸一歸
躬行汎掃以畢餘願尊靈未泯鑒此誠意尚饗

祭黃師是龍圖文

嗚呼尊先使君與我早歲旅于天廷自唐已然同年友朋異姓弟
兄南北東西不約而親義灼灼生君家在陳我官陳庠時始合并
君方少年出從鄉貢曄然有聲一飛絕羣不入州縣數載公卿無
惡於民無怨於友氣和且平我遷南方歸來老矣故舊無幾君家
父子見我京師相顧而喜往來綢繆昏姻之好實始于此我廢于
時君仕日躋一榮一瘁親友之恩始終不渝尤也君子君子于父兄
人無間言閔子是似其於吏民不剛不柔次公之比謂當百年仰
事慈親以及愛弟奈何不淑有志不終中道而棄丹旆翩然宛耶
之隅萬事已矣我老杜門素車不行一慟永已嗚呼尙饗

祭范彞叟右丞文

維年月日具官蘇轍謹遣男具官遲以清酌庶羞之奠致祭于故
右丞范公彞叟之靈維昔先正文正稱首嗟我晚生不識耆舊從
事南都見其叔子議論琅然前人是似我遷南方六年而歸平生
交舊多聚京師晚遇仲氏秉國之維以義知我傾蓋不疑我復遷
南仲亦繼往瘴癘侵凌氣血凋喪同歸潁川白首相向問疾于牀
執手無言慟哭其堂殲此忠賢公方在朝四方所瞻居未逾歲亦
來守邦顧我里閭盃酒相從往還之歡意若將終我寓汝南公旅

續城後集卷之二
彭城尺書不通期我以誠我還舊廬終歲杜門公歸訪我欣然笑
言三日不見而以計聞老病無朋誰復念我永懷仲叔言出涕墮
嗚呼哀哉尚饗

祭寶月大師宗兄文

維紹聖二年歲次乙亥十月癸亥朔十一日癸酉降授左朝議大
夫試少府監分司南京護軍蘇轍因僧法舟西歸以香茶果蔬之
奠致祭于故寶月大師宗兄之塔轍方志學從先君子東遊故都
覽觀藥市解鞅精舍時始見兄頎然如鵠介而善鳴宗黨之故情
苦舊識屈信臂頃閱歲四十性直且剛纖惡不容與人盡言口如
病風惟我兄弟不見瑕玼行有利病勢有隆汙始終一意不爲薄
厚交遊之間蓋未始有昔我之東師則有言遊宦如寄非可久安
意適忘歸憂患所由亟還于鄉泉石可求我志師言未返而顛師
亦不待與化俱遷遣舟與檠萬里來計開紙失聲悔恨無所彈指
西望邠塔旣成臨絕之言求我以銘自我竄逐憂病相襲緝綴清
風得一忘十追懷曩好徒有此心心則不忘而病未能收淚語舟
歸酌流水一生一死誠則無已嗚呼尚饗

祭道遙聰長老

紹聖三年九月二十九日降授左朝議大夫試少府監分司南京

護軍蘇轍謹以香茶果蔬之奠告于故逍遙長老聰公我生多故
再謫於筠萬里故鄉孰為故人師自吾蜀為筠導師坦然無心言
直氣夷願我如故彌久而堅逮茲再來為我出山逍遙無師眾願
師往師念我獨為眾所強入山幾何自春徂秋一病不治蟬蛻莫
留此心超然去住不疑筠人懷思涕泣嗟咨山中來告卯塔將成
一奠之哀斯未忘情尚饗

樂城後集卷之二下終

